

A nivel cun ils chors professiunals

Ina fin d'emna da success per l'ensemble vocal Incantanti a Graz

■ **(vi) Visitas da concerts e participaziun a lavuratoris, atgnas producciuns ed in chant avert: Igl è stà in program multifar quai che l'ensemble vocal Incantanti ha già d'absolver a Graz.** «In'interpretaziun modesta, ma elavurada da fin che desista da sfurzar volumen e tun e ch'è variabla en l'expressiun, tut tenor las pretenziuns dal text, tuttina animant e viva», quai è stà il giudicat dal chant dals Incantanti dal mander dal festival *Roland Geister* en ses pled final a chaschun dal festival da chors «Voices of Spirit» a Graz.

Igl è in'onur per in chor giuven dal Grischun dad adina puspè vegnir envidà e dastgar sa preschentar en l'exteriur. Spezial per il dirigent dal chor *Christian Klucker* èsi stà questa giada ch'el era vegnì envidà da manar in lavuratori da chant a chaschun da quest festival internaziunal da chors. Ultra da l'agen chor èn sa partici-

pads ils dus chors professiunals, il chor Nive dad Israel ed il Chor statal da la Lettonia. Per ils Incantanti èsi stà captivant da s'entupar cun quels chors d'elita e da collavurar cun els sin il medem nivel.

Preschentà spezialitads svizras

Il dirigent Christian Klucker ha mess en il center la sonorità da las chanzuns en sia lavur cun ils chors ch'eran s'annunziads per il lavuratori. Cun quai ha el purtà sia eccellente lavur ch'el fa cun il vocalensemble Incantanti sin il nivel internaziunal. Per el, ch'ha sia patria en il chant rumantsch, è la sonorità il pli essenzial da la musica chorala ed in'atgnadad tipica per la chanzun rumantscha. Perquai èsi evident ch'igl è vegnì preschentà surtut chanzuns en il quart lungatg naziunal sut il titel «spezialitads svizras».

La participaziun dals Incantanti è vegnida sustegnida da la fundaziun culturala Pro Helvetia.

Quai ha pussibilità in concert communabel cun il rudè da chant da Raaba, ina vischnanca en l'aglomeraziun da Graz, ed in chant avert manà da Klucker. Sco adina a chaschun d'inscuters dals Incantanti è era stada la tgira da la buna cumpagnia in factur impurtant: Per quest motiv èni s'entupads las sairas cun chanta-duras e chantadurs dals chors amis, ed igl n'è nagina surpraisa che er a questas occasiuns èn resunadas tantas chanzuns, perquai ch'ellas collian – perfin professiunals ed amaturis ambiziunads.

Dentant èn ils Incantanti puspè turnads en Svizra. Ed er qua pon ins puspè giudair lur chant: La sonda dal 1. da december a las 17.00 en l'Hotel Fravi ad Andeer a chaschun da la preschentaziun dal cudesch davart Benedetg Dolf ed ils 15 da december a las 20.00 en la baselgia da la sontga Crusch a Cuira a chaschun da lur concert da Nadal.



L'ensemble vocal Incantanti a chaschun da sia producciun al festival da chors internaziunal «Voices of Spirit» a Graz.